

漫堂年譜



則能插矢於地縱馬射之兩矢相合不繼黍失我
聞王陽明先生九歲時從其父海日公於都門間
脫身走居庸紫荊倒馬諸險要縱觀邊塞於是才
志雄拔意氣邁上及長遂能兼理學事功文章之
盛宋子幼時亦從文康公視師漁陽歷覽關塞嘗
飛騎追黑白兔雖材官蹶張之士不能馳而及也

二年乙酉

三年丙戌

余十三歲先文康以大學士范公文程等薦陞內
翰林國史院大學士犖隨任學聲律學書

四年丁亥

余十四歲 三月

上諭諭吏兵二部國家當開創之初文武大臣俱

為國宣力在京三品以上在外總督巡撫提督總
兵各送親子一人入朝侍衛察試才能授以任使
犖遵 諭入朝為三等侍衛乘馬佩刀每日寅刻
由東華門入隨勳舊大臣環坐左翼門下辰刻隨
諸大臣至 乾清宮侍

太皇太后

世祖章皇帝饕蒙 賜食食罷歸寓午刻復入申
刻於 保和殿侍

世祖章皇帝饕亦蒙 賜食日入而歸率以為常
凡 郊廟朝會皆得廁屬車豹尾間大宴則環坐

太和殿內東偏 御座之旁一日 賜宴犖取珍
果一二置懷中蒙 天語垂問犖跪奏臣祖母丁
氏年七十臣將攜以奉榮君賜臣冒昧罪當死
上笑曰此後聽汝攜歸犖因備油素為包裹具每
宴罷懷袖間纍纍皆上珍丁太夫人顧而喜曰孺
子荷 天寵乃爾爾父子當思所以報 九月大
羽獵自午門前乘馬佩弓矢扈 蹕行歷文安霸
州西山凡二旬而返每日五鼓至木城外下馬解
弓矢佩刀由東門經慢城入環坐 御帳外東偏
味爽

上於帳前涼棚下陞座茶罷起 駕急趨上馬萬
騎驕驤飛塵障天咫尺不辨人馬頃之乃按轡徐
行遙望圍場已數十里矣圍分三重
上與諸王大臣居中二重衆官三重甲兵各按旗
色步伍肅然毋敢闌入內圍者獨侍衛出入不禁
犖時附鑲黃旗下辰巳之交 駐蹕進饕衆皆下
馬出所攜乾餼酌野水而食須臾上馬馳驟如前
日落 駐蹕得獐麋雉兔無算或 頒賜或付行
廚凡行宮供具皆於辰刻預設之漏下二鼓由東
門出於圍之二重東偏尋帳房就寢還經桑乾河